



Comunu de Quartu Sant'Aleni



Arregota de cancelleria po is famillias chi tenint prus bisòngiu: Quartu sèmpiri prus de bonucoru

Quartu ammostat ancora una borta cantu est de bonucoru. S'arregota de cancelleria, promòvia de "Cittadinanzattiva" e de su "Coordinamento dei Presidenti dei Consigli d'Istituto della Sardegna", cun s'agiudu de su comunu de Quartu Sant'Aleni at tentu sorti meda cun unu linnaxi de cosas arregotas chi ant a diventai prexu po is pippius chi ant a andai in is scolas de sa citadi.

Progetu sa Lìngua in Quartu
mail: ufitziusardu24@gmail.com
<https://www.facebook.com/progetusalinguainquartu>
PROGETU FINANTZIAU CUN DINAI DE SA REGIONI AUTÒNOMA DE SARDÌNNIA CUNFORMA A SA L.482/99 E A SA L.R.
22/2018 .

Is volonteris de is assòtzius e de s'organismu scolàsticu fiant in su Carrefour totu sa diri de mèrculis s'11 de cabudanni po spiegai a sa genti e arregolli su materiali arregalau de is chi gai scidiant de s'abrìtiu. De is 09:00 a is 19:00 ant ammostau su coru bonu de is quartesus e de sa genti de is àteras biddas chi andat a su centru commerciali.

Ariseru, cun s'agiudu de s'Assessorau a s'itruzioni pùblica, is cosas arregotas sunt stètias lassadas in su “Non negozio”, chi in is localis de bia Beccaria – chi oberrit su martis de is 10:00 a is 13:00, su mèrculis de is 10:00 a is 12:00 e sa giòbia e sa cenàbara de is 16:00 a is 18:00 – imprassat sa genti chi prus tenit bisòngiu e is chi s'agatant in unu momentu de discumbenia e tenint bisòngiu de agiudu.

Medas lapis a coloris, mannus e piticus, ma puru lapis normalis de ònnia tipu, HB e HB2, 2B, 2H e cun sa mina arribendi a 1000 prus o mancu; pinnas po pintai, inclùdias cussas “magiche”, una atividadi de giogu brofetosa meda po is pipius, e medas cuadernus mannus, gai 500, puru cussus cun is aneddus de ferru, innoi is pipius ant a podi incarrerai a imperai is primus lìteras e is primus nùmerus cun pinnas de pintas diferentis: asullas, nieddas, arrùbias e birdis.

Non mancant mancu is cuadernus po trassai, cartolàius, colla, cumpassus, marcadoris, rigas e temperalapis. Totu custu bonucoru at andai imoi a agiudai is famìllias chi tenit prus bisòngiu, stalladas cun s'agiudu de s'Assessorau comunali a is servìtzis socialis e de àteras organizatzionis de assistèntzia sociali. Sa trasparèntzia e s'eficatziedade de sa pratzidura ant a essi assiguradas po chi ònnia cosa arregalada arribit in is domus e in is bursas de chini ndi tenit de a berus bisòngiu.

“Torru gràtzias de coru a s'Assòtziu “Cittadinanzattiva” e a su “Coordinamento dei presidenti dei Consigli di Istituto” de sa Sardigna po essi postu in paris custa arregota de cancelleria in agiudu a is bisongiosus” narat s'Assessora comunali a s'Istruzioni Pùblica Cinzia Carta “e unu gràtzias de coru andat puru a su “Non negozio” de bia Beccaria, chi s'est postu a disponimentu po pratziri totu a is famìllias bisongiosas.

S'agiudu mannu donau fait biri chi nc'est ancora genti meda de bonucoru. Scideus chi famillias medas tenint dificoltaidi a primìtziu de s'annu de scola ca tenint spesas medas: totu su chi serbit po sa scola, is liburus e is bistiris nous. Custu abrètiu est unu agiudu veru po totus is chi ndi tenit bisòngiu”